

愚

齋

存

稟

愚齋存彙卷第五目錄

奏疏五

覆陳盧漢鐵路款無可勻撥摺

酌擬武衛中軍存寄通商京行餉銀辦法摺

請分別籌修北省拆毀電杆電線摺

請嚴治毓賢罪狀片

遵 旨籌辦陝西義振摺

余聯沅捐振請獎片

湘鄂折糧等銀請全數解陝充振片

補授宗人府府丞謝 恩摺

充會辦商務大臣謝 恩摺

請刊用木質關防片

呈進 御寶摺

在籍京員助振請加獎擢摺

籌集商本分別展造及修復電線摺

蔡鈞捐振請獎片

唐李氏等助振請准建坊片

呈進南洋公學新譯各書並擬推廣編輯摺

請調沈曾植費念慈委用片

請專設東文學堂片

陳盧氏助振請准建坊片

上海華廠紡織虧累招商接辦摺

湖北鐵廠免稅展限摺

請調何其坦差遣片

愚齋存彙卷第五

奏疏五

覆陳盧漢路款無可勻撥摺

光緒二十六年六月

奏爲遵

旨覆奏事光緒二十六年六月十四日承准軍機大臣
字寄光緒二十六年六月初四日奉

上諭現在統籌戰備迭經諭令各省籌餉練兵共保疆
土惟庫款支絀餉項艱難旣與外洋決裂所有各直省
認還洋款著卽暫行停解聽候部撥移充軍餉至盧漢
鐵路自應緩修盛宣懷所領部款及與比國借款動用

若干著迅卽報部暫行勻撥兵餉以濟要需將此諭知戶部並由六百里加緊諭令各直省將軍督撫及盛宣懷知之欽此伏查盧漢鐵路議准借部款銀一千萬兩二十三年夏間經戶部先撥銀四百萬兩自盧保淞滬漢灑三段先後開工築造至二十四年夏間所有部款四百萬連南北洋官款撥銀三百萬卽支用垂罄經臣會同直隸督臣榮祿湖廣督臣張之洞於六月十四日附片奏明籲請照案續撥嗣由戶部劃撥各省昭信股票三百萬兩陸續收過二百十萬餘兩又戶部奏准將提回德華鎊款合銀八十八萬二千七百五十八兩六

錢二分撥作盧漢鐵路經費均卽陸續撥付自保定至正定勘路購地料價築路各款暫存上海總公司者常不及十分之一保正一段原限五月告成正定以南亦在接續購地籌備開工向來解往北路銀錢料物皆由天津分撥盧保通車以後又以長新店爲總匯之地以保定爲轉運之地拳亂猝發迫不及防盧保鐵路首當其禍自高碑店北至盧溝橋百數十里間軌道車站機器車輛以及一切分儲轉運之料物銀錢焚搶拆毀蕩焉無遺自高碑店南至保定以迄正定三百餘里已成及將完之工程亦被逐節焚毀拆損存儲料物搶失尤

鉅華洋員司工匠奔逃傷亡道途梗絕毀失之數目前無從查考將來修復之費洋員洋匠死亡損失賠償撫卹之費尙不知如何籌措至所借比款均存比法銀行按月需款若干由比國公司撥來若干總公司並無絲毫存款上年九月臣與裕祿張之洞奏請將蘇粵等省已撥未解之昭信股票款另行籌撥片內業經陳明統計撥付來華之款將及一千萬兩料價金鎊約各得其半現在北路工匠星散本已停工南路亦正危疑在事者均願緩修惟照常工作則比款不能不來一旦停緩則比款自此不至不特無由勻撥兵餉且恐比公司以

已付之款已作之工半途停廢虧耗之鉅不能不索償
於
國家而楚豫之間工役於路者不下五六萬人驟令停
遣北事未定亦慮貽

朝廷南顧之憂張之洞顧念大局力任保護臣亦督飭
在工各員勉爲其難如戰事不已勢亦必須停辦而將
來之喫虧更不知若何結束矣所有盧漢路款無可勻
撥緣由謹恭摺覆陳伏乞

皇太后

皇上聖鑒謹

奏 七月初七日奉

硃批著路礦總局查覈辦理欽此

酌擬武衛中軍存寄通商京行餉銀辦法摺

光緒二十六年九月

奏爲遵提京都中國通商銀行所存武衛中軍餉銀現據華洋大班稟覆情形酌擬賠繳辦法恭摺覆陳仰祈聖鑒事本年七月十七日承准軍機大臣字寄光緒二十六年七月初九日奉

上諭前據榮祿奏稱武衛中軍餉銀三十一萬兩向存京都中國通商銀行因該銀行已被焚燬該行商致上海銀行信憑請由上海兌撥當經飭知余聯沅傳知上海銀行就近兌交卽存上海道庫以備運撥茲據該道電稟已欽遵咨呈盛宣懷提解等語卽著責成該京卿

迅將此項銀兩如數提交江甯藩庫代存以便由該大學士酌撥毋稍延誤將此由六百里諭令知之欽此遵查此案先接蘇松太道余聯沅節次咨呈先准武衛中軍糧餉處咨傳該號管商馮商盤梁景和將本軍寄存中國銀行餉銀三十三萬兩全數提存關庫續奉榮祿札飭向上海中國通商銀行將武衛中軍糧餉處前存該行足銀共二十六萬兩又寄存該行庫內銀五萬兩如數提存候撥各等因咨呈轉飭前來當以京津擾亂馮商盤等不知所在事關軍餉豈容懸宕無著卽飭上海銀行商董嚴信厚等會同華洋大班美德倫陳淦查

明遵辦去後旋據覆稱滬行與京行往來至本年七月
爲止京行尙欠滬行銀二十八萬餘兩前項餉銀確無
絲毫匯到上海且前後咨札文內銀數既有異同存款
寄款又參互不明京行華洋大班厚士敦馮商盤尙無
下落一切帳目簿據均未寄滬無從查核滬市奇窘行
本存款悉數放出一時實難籌墊請俟事平復業趕緊
清釐等情業經咨復余聯沅查照轉復一面飭卽催查
京行華洋大班迅速攜帶帳目出京責成設法賠繳在
案欽奉

寄諭後復經嚴催以水陸路梗輾轉兵間洋大班厚士

敦華大班馮商盤昨甫先後至滬卽據稟稱武衛中軍
餉銀三十一萬兩均係本年春夏間分起交行內分三
票一係七月二十一日期五萬兩一係閏八月十五日
期二十萬兩一係九月十九日期一萬兩此外另有寄
存銀行庫內銀五萬兩銀行章程存款訂定還期無論
國家官民之款法當放出流通故前項內有二十六萬
兩皆放給京津兩處鑪坊錢莊商號以流通市面寄庫
款五萬兩則係暫時寄儲不定何日提取法當原銀存
庫不動五月間拳匪肇亂橫行焚殺天津破壞遂及北
京兵匪混合無路遷避二十六日兵勇拳匪蜂擁進行

搶毀既罄繼以焚燒庫銀房屋及一切契券一掃而空
厚士敦密派多人冒險探視目擊進行焚搶者大半皆
身穿號衣之兵勇當時經華大班副手陳敬臣稟知榮
祿奉諭已發令嚴辦所有搶去前項寄庫銀五萬兩一
款按國法商律決無令銀行賠償之理嗣因該軍需款
甚急而銀庫已經被搶不特存庫兵餉五萬無著卽行
內現銀現洋亦均搶去不得已自六月初起至七月初
十後止向別處陸續籌交銀五萬兩兵事方棘未請發
還存票暫時列入摺據尙餘存款二十一萬兩現在津
京市面摧毀放出之款無從追繳存行之銀搶失無遺

變起非常事出意外銀行委無應得之咎目前亦無墊
繳之方究應如何辦理伏候核奪等情臣伏查該行華
洋大班稟陳京行搶燬情形眾口皆同委無虛飾寄庫
銀五萬兩既爲兵勇士匪所搶各國商律姑勿具論按
之

朝廷法紀亦應查明管帶之營哨官與有巡防彈壓職
任之地方文武照律擬辦所有存款二十六萬兩除六
七月還過五萬兩外尙存二十一萬兩軍需要項將來
放出之錢莊商號能否復業收清官中不能過問必須
責成該銀行如數賠繳不准短少絲毫惟此次亂事京

津銀行固掃地無餘上海各埠生意停滯亦皆大傷元氣通商銀行爲中國挽回利權而設創辦三年僅能自立。

國家有官款一百萬在內與眾商休戚相關今於萬分艱窘之時將武衛中軍京行存款二十一萬兩又寄存行庫款五萬兩一旦盡欲取之滬行勢不至運掉不靈迫而擠倒不止中國銀行積資甚淺魄力尙微一蹶何可復振大學士臣蔡祿體

國恤商亦必不肯出此擬請酌分期限由該銀行立限從本年九月初一日起限六箇月屆滿償繳十一萬兩

一年屆滿償繳十萬兩以重餉款而寬商力該軍糧餉處續由鎮江上海漢口重慶四處匯用銀三萬三千兩卽在六箇月償繳數內除算此外被搶前項寄庫銀五萬兩眾商董皆稱按照國法商律銀行難以賠償但中國通商銀行之設意在集商力以報効

國家擬請立案俟該銀行稍有餘利仍令如數提撥銀五萬兩以歸寄庫被搶之款所有酌擬武衛中軍存寄京都通商銀行餉銀辦法謹恭摺復陳是否有當伏乞皇太后

皇上訓示再此案因待京行華洋大班來滬致稽時日

是以復奏稍遲合並陳明謹

奏 本月十五日奉

硃批該衙門覈議具奏欽此

請分別籌修北省拆毀電杆電線摺

光緒二十六年九月

奏爲籌修北省拆毀電報杆線飭據商董議請分別辦理以重報務而杜效尤恭摺奏陳仰祈

聖鑒事竊自拳匪事起京師至保定電線首被拆毀曾不踰時京津一路繼之津德一路又繼之山西河南無洋兵無拳匪之地亦繼之馴致晉豫直隸東三省境內蕩然無一線之遺自夏徂秋南北隔絕中外阻塞

朝廷之指揮封疆之機要兩不相及貽誤實多豫省毀線之後接准撫臣裕長咨會已

奏緩興修遼聞

車駕西巡

臣

卽分投派員運料趕修晉線然猶有隨修

隨毀之事近日疊接湖廣督

臣

張之洞調任河南撫

臣

于蔭隸電商以豫省運道總匯洋兵趨保尤恐漸移而南屬卽派員接修當飭商局各總董會議修復去後旋據稟稱所毀杆線太多全責商股興復不特商力實有未逮似於法理亦未持平擬請將直隸東三省曾經戰事之處經敵致毀並非地方官保護不力者由商人集股重造如晉豫兩省並無戰事實係州縣不任保護甚有指使拆毀者應援照光緒十三年貴州畢節拆線十八年山西霍州等處毀杆成案由地方官賠修請

奏明咨商奉准以便墊款趕辦等情前來伏查此次被毀電線地周六省線路過長興修費鉅該商董等所稟商力未逮自係實情且內匪外兵擾動

畿輔全賴晉豫鄰近傳報靈捷顧乃蔽聰塞明求無聞見而彼洋兵所至行軍電報卽接踵而來是毀線之舉祇以自困何損於人當此寰海大通之日猶挾深閉固拒之心若非有所儆戒恐經年累月修之而不足者一朝一夕毀之而有餘該商董等議由官商分別賠修委係酌理準情懲前毖後之意昔年畢節霍州等處拆線毀杆之案均經黔晉兩省撫臣

奏明由官賠修地方州縣多予撤查拏辦人犯有罪當
重辟者以視今年晉豫兩省電線之全境盡毀情形輕
重尤覺懸殊相應援案籲懇

聖明垂察准照各商董所請飭將晉豫兩省修復電線
工料經費仍由地方官賠償以體商情而重報務當日
州縣各官之有無縱容指使煽眾拆毀之有無首惡渠
魁應否查明懲辦以儆効尤是在各該撫臣察核施行
以盡保護之實非臣所宜擬請其直隸東三省有戰事
地方將來次第籌修仍統由眾商承認集股修造以盡
報効之忱除將晉豫兩省電線先行派員購杆運料趕

籌修接外所有電報商董議請分別籌修北省拆毀杆
線辦法緣由謹恭摺具陳是否有當伏乞

皇太后

皇上聖鑒訓示謹

奏 本月十五日奉

硃批著照所請該部知道欽此

請嚴治毓賢罪狀片

光緒二十六年九月

再此次拳匪流毒畿疆不三月而致

宗社顛危

乘輿遷播非常之變禍根實伏於山東一省撫

臣

毓賢

前在東省倡爲義民之說縱令會匪仇殺教民如大刀

會梅花拳會等日無法紀凡牧令指爲匪者必呵斥緝

辦者必撒叅去冬在京結徐桐剛毅等多方煽惑自稱

爲拳首並捏稱義和團不畏槍礮一派虛言徧傳都下

及其在晉誘洋教士五十餘人至省駢誅身爲疆吏一

味任性竟不一念天下大局如何收拾

臣

在滬聞德國

恭齋字襄

卷五

奏疏五

三思補樓藏版

使臣統帥及各國總領事皆指爲釀禍之魁恭讀閏八月初二日

上諭此次開衅致禍之由皆因諸王大臣等縱庇拳匪亟應分別重輕加以懲處等因仰見

聖明在上正本清源足爲中興基礎惟溯厥由來義和團實倡自毓賢王大臣之所以縱庇拳匪皆惑於毓賢之說

朝廷制律議罪以起意者爲首自當嚴治毓賢之罪以謝天下併以謝各國臣又聞德使穆默面告戕彼使臣德皇必欲禍首抵償方能雪憤此次兵犯保定意欲生

擒毓賢苟爲先發制人之計伸我

國法卽以存我

國體如毓賢者本爲

社稷蒼生所不容實難稍事姑息

臣在海上熟聞其說

爲大局計不敢再事緘默謹附片據實密陳是否有當

伏乞

聖鑒謹

奏 本月十五日奉

旨留中

遵 旨籌辦陝西義振摺 光緒二十六年十月

奏爲遵

旨籌辦陝西義振事宜恭摺覆陳仰祈

聖鑒事竊 臣於光緒二十六年九月二十八日接准兩

江督 臣劉坤一護理江蘇撫 臣聶緝梨鈔摺咨會光緒

二十六年九月十四日奉

上諭戶部奏陝西災象已成擬遴派義紳募捐辦振一摺盛宣懷久駐上海熟悉商情並飭勸募鉅款源源匯解以資接濟等因欽此正在會商歷年共籌義振紳商設法勸募十月二十四日復承准

行在軍機處大臣電屬設法勸捐先行籌款若干卽交嚴作霖隨帶赴陝辦理急振等因仰惟

皇太后

皇上如傷之仁淪浹寰海矧以關中天府之重適當

巡方駐蹕之時饑饉洊臻濟施難緩凡在臣庶皆當竭力救恤上慰

憂勤前日嚴作霖來滬與臣熟籌茲事當又傳集各紳

商誠求切酌諸人皆向任勸捐不遺餘力此次僉稱自北方大亂南人財貨之損失消耗者蓋不可以數計上海爲南北商務總匯之區自夏徂冬敵艦縱橫於淞口

敵隊雜遯於街衢百貨停滯市埠中空眾商仰屋勸捐
匪易卽如臣所管之輪船電線兩公司不僅又不敷出
公司所有北省產業非毀卽奪幾有力難自保之勢實
不同往年辦災可以激勸而得鉅款蓋仁義之心爲財
力所限此皆勸募艱難之實在情形也况振饑一事不
啻救焚拯溺勸捐雖切亦屬緩不濟急非先行墊款速
放急振不足以蘇民困臣頃與同人竭力湊集已得護
蘇撫臣聶緝梨交嚴作霖協振一萬兩升任湖南藩司
余聯沅捐助一萬兩嚴信厚嚴作霖各籌墊一萬兩施
則敬籌墊一萬二千兩臣向蘇藩庫經借一萬兩向滬

關經借五萬兩在輪電兩局各墊一萬兩共銀十三萬二千兩尅日解赴漢口由嚴作霖隨帶赴陝昨接陝西撫臣岑春煊電告陝振捐款已

奏准請獎實官仰懇

敕下戶部速卽頒發照收以便遴派公正員紳並飛電各處勸捐庶可一面歸補墊款一面陸續接濟特是嚴作霖約計行期須在十一月底到陝急振萬不能坐待臣已電請岑春煊遴員先辦官振仍倣義振辦法擇樂善耐苦之京外官派往各州縣挨查戶口分別極貧次貧隨查隨放勿全憑董保造冊勿任令吏胥過手俟嚴

作霖到時再擇極重州縣令辦加振庶中澤哀鴻不至
久轉溝壑期以仰副

聖主發政施仁之至意所有

臣遵

旨籌辦陝西義振事宜緣由謹繕摺覆陳伏乞

皇太后

皇上聖鑒訓示謹

奏 十一月二十七日奉

硃批戶部知道欽此

余聯沅捐振請獎片

光緒二十六年十月

再升任湖南藩司蘇松太道余聯沅自聞水災首先捐

助庫平銀一萬兩交

臣

彙解

臣

查該藩司心懸

君國大局關懷救災恤鄰出於誠悃本絕無希望名譽之心惟值此時艱集捐寡術臣下慨捐鉅款

國家似應有獎勸鼓舞之道以示來者查龔照瑗前在蘇松太道任內亦以捐助直振經直隸總督

臣

李鴻章

奏獎蒙

恩賞給頭品頂戴余聯沅係二品大員應如何給獎之處祇候

恩施非臣下所敢擅擬謹附片陳明伏乞

聖鑒謹

奏 十一月二十七日奉

硃批余聯沅著賞給頭品頂戴欽此

湘鄂折糧等銀請全數解陝充振片

光緒二十六年十月

再陝灾極廣冬振固須急辦明春青黃不接爲日方長
據嚴作霖面商擇極重州縣官振之外加發義振一次
至少需銀三四十萬兩勸捐之事東南已成弩末今年
適經北亂物力凋耗更非昔比臣與同志諸人雖竭誠
籌勸亦斷不能如往年之踴躍似應預籌有定之款以
資補助伏查湖北湖南兩省每年採辦糧米六萬石運
運腳交倉經費一切在內約得銀十五萬餘兩近年如
順直山東湖北各省因偏灾截撥辦振屢有成案可否
仰懇

聖恩敕下兩湖督撫臣將前項折收糧米連運腳等項銀兩全數提前撥解陝西充振再輔以捐募俾免緩急不濟之虞謹附片具陳是否有當伏乞

聖鑒謹

奏 十一月二十七日奉

硃批戶部議奏欽此

補授宗人府府丞謝

恩摺

光緒二十六年十一月

奏爲恭謝

天恩仰祈

聖鑒事竊

臣

恭閱邸鈔十一月初一日

行在內閣奉

上諭盛宣懷著補授宗人府府丞欽此跪聆之下感悚
莫名當卽恭設香案望

闕叩頭伏念

臣

一介庸愚疊承

恩渥監司曾厠京秩旋躋始副位於奉常曠官滋謂繼
貳班於廷尉要職仍虛茲以屬籍之尊俸任典司之事

何期驚鈍歷踐清華深惟強幹之宏圖期平如砥之周
道望函谷秦關之佳氣霄漢懸心戴

高天厚地之

殊恩涓埃矢報所有

微臣

感激下忱理合恭摺具陳伏

乞

皇太后

皇上聖鑒謹

奏 十二月初二日奉

硃批知道了欽此

充會辦商務大臣謝

恩摺

光緒二十六年十一月

奏爲恭謝

天恩仰祈

聖鑒事竊

臣

接閱電傳邸鈔光緒二十六年十一月十

五日

行在內閣奉

上諭盛宣懷著充會辦商務大臣欽此聞

命自天感悚無地當卽恭設香案望

闕叩頭伏念

臣

姿才凡下地望俱微遭遇

聖明敎歷清要已有叨竊非分之懼願蒙

勅諭字義

奏疏五

三思補樓藏版

寵渥復厠商曹置構柎於重楹策駑駘以千里內慚力
薄外願時艱慮貧

生成罔知所指竊惟西人以商立國歐美大邦能以富
強縱橫五洲者大抵皆商務興盛所致故特設專官修
明商政富國大猷視之至重中土由秦漢以降有抑末
之說不知商爲四民之一周官司徒之屬自司市至司
關十二職莫非商政所以爲商謀者至纖至屑而所言
無者使有利者使阜害者使亡靡者使微尤商務之精
義西國之善治商學者亦未能出其範圍也臣自壯歲
創辦輪船電報嗣復旁及礦廠鐵路涉歷商事垂三十

年時過後學所得良淺但於中外商業通塞之殊商情
舒困之別利弊所在略有見聞今

朝廷舉千載曠廢之政特開曹部將以振起商戰足國
足民一俟款議大定所冀上衷周制下鑒列邦廣商學
以植其材聯商會以通其氣定專律以維商市興農工
以濬商源阻格胥蠲職事可舉臣當商承李鴻章次第
設施竭手足之力矢之以實心以期仰答

高厚鴻慈於萬一所有微臣感激下忱理合恭摺具陳

伏乞

皇太后

皇上聖鑒謹

奏 十二月十三日奉

硃批知道了欽此

請刊用本質關防片

光緒二十六年十一月

再中國創設商務大臣爲中外商民所矚矚上海綰轂
華洋實天下商務樞紐所在通商惠工之事當徐導先
路以副眾望日本明治初年旣開互市商業操術不工
敗折衰微與今之中國相似其後專立農商部開商法
會議所設商法學校不十年而內商生機日盛遂能戰
勝外商權利不失臣奉

命會辦計所設施亦不能不從此入手並當與各省督
撫地方官互相聯絡方免隔閡一切文牘須有關防李
鴻章遠在京津往返鈐印稽遲太久且該大臣綜領宏

綱亦恐不便瑣屑商推擬卽刊刻木質滿漢篆文關防
一顆文曰

欽差會辦商務大臣關防嗣後遇有重大事件必當商
請李鴻章會銜辦理其餘尋常事件卽由臣就近隨時
酌辦仍分別咨明查照以歸簡便謹附片陳明伏乞

聖鑒謹

奏 十二月十三日奉

硃批著照所請欽此

呈進 御寶摺 光緒二十六年十一月

奏爲呈

進

御寶恭摺仰祈

聖鑒事竊臣訪聞昨有西人自京都來滬攜得

御寶行將歸國當卽派人輾轉尋求商令出視敬謹審
驗玉質之色大小之度篆刻之文悉與

皇朝文獻通考內載

御用各寶之第一分敬天勤民寶脗合無譌竟體完善
光采煥發該西人深知珍重不願求售昭以重價侑以

古玉始允讓還臣乃恭製

寶盃妥慎呈

進

西清世守呵護有靈七鬯無驚斯其先應臣惟人君者

天之子也民者邦之本也伊古以來唐虞三代之盛堯

舜禹湯文武之聖質十尙已尋覽二典三謨與夏商周

之書其君若臣所交咨互做者無非兢兢於皇天無親

民罔常懷而以懋德格天爲欽崇施德於民爲保極故

世之隆替國之興亡非廣土眾民之可恃敵國外患之

可憂也視當時君臣之承

天者敬否而已矣敬否不可見視當時政治之及民者
勤否而已矣我

朝

列聖垂統奉若建中同符古帝

聖祖仁皇帝始用是寶鈐印

御書

世宗憲皇帝乃特留備用

高宗純皇帝敬遵

成典并

御製詩序鐫於四周

聖謨洋洋心傳永紹我

皇太后

皇上投艱遺大惟日孜孜蓋無日不上嚴明畏下懍明
威顧陽九百六之年不能無遷殷避狄之事然惟
天惟百姓實共鑿之特使是寶遇危而終安幾晦而大
顯以示

上天孚佑兆民允懷之徵驗蓋亦

三聖在天之靈實式憑之臣尤伏願

皇太后

皇上新舊邦以答

天命屈小不忍以生烝民益慎厥德視厥

祖無時豫怠以盡敬之勤之之實苞桑重固天日永中
此溥海臣民所延頸企踵者也所有呈

進

御寶緣由謹恭摺具陳伏乞

皇太后

皇上聖鑒謹

奏 十二月 日奉

硃批御寶敬謹收藏該府丞留心可嘉欽此

在籍京員助振請加獎擢摺

光緒二十七年正月初六日

奏爲在籍京員獨捐鉅款濟助義賑籲懇

優加獎擢以昭風勵恭摺仰祈

聖鑒事竊

臣前奉

諭旨勸辦陝省義振業將先籌墊款交嚴作霖攜帶赴
陝趕辦急振並一面設法勸募接濟情形

奏陳在案伏念此次災區過廣需款殷繁東南當商務
疲困之時義振處強弩銳末之後惻隱之性既澹於物
力之日艱富豪之家亦苦於發棠之已屢嘆音瘖口焦
灼彌深茲據勸捐委員稟稱浙江在籍三品銜工部郎

中劉錦藻自聞陝災憂兼

君國情殷紆難不憚毀家特變產倡捐庫平實銀六萬
兩擬請奏懇格外優擢以五品京堂候補用示鼓勵等
情前來臣惟漢武帝時西河歲惡卜式率齊人入粟又
嘗欲輸其家半財助邊武帝尊顯卜式以風百姓乃由
布衣拜郎賜爵近日如捐納郎中邢傳經捐銀一萬兩
已蒙

特恩賞給四品卿銜今劉錦藻係進士出身在官居鄉
有端謹之譽所捐銀數較邢傳經多至六倍雖臣子葵
藿之悃善無近名念其義形於內雅希漢臣可風流俗

自古王者馭世之道往往有施破格之賞而不爲濫者
特五品京堂雖係正途郎中內轉應升之階非臣下所
敢擬請可否遠取尊顯卜式之義近以邢傳經爲比例
將劉錦藻

予以優異使天下皆有所勸慕出自

聖主逾格鴻慈除將劉錦藻捐銀兌收彙解外所有在
籍京員捐助義振鉅款額懇優獎緣由謹恭摺具陳伏
乞

皇太后

皇上聖鑒訓示謹

奏 本月十九日奉

硃批劉錦藻著以五品京堂候補欽此

籌集商本分別展造及修復電線摺光緒二十七年四月

奏為籌款展造潼關至河南直隸電線以備

蹕路傳遞要報恭摺仰祈

聖鑒事竊臣前據

行在官電報局總辦道員孫寶琦等電稟奉軍機處面

諭將來

回鑿過豫直各境無線

諭旨章奏阻攔堪虞似應另添一綫

蹕路出潼關約經陝州河南府至孟津渡黃過懷慶衛

輝彰德入直境由順德廣平正定三府以達保定又據

稱龍駒寨等處山道紆曲夏雨時行線路恐多阻滯應俟新線造抵河南府卽備料造至開封府以便與山東江蘇另添一路以通要電屬卽籌款趕辦等語查設線以購運線料木杆爲大宗路長工促當卽電商直隸督臣李鴻章河南撫臣于蔭霖松壽通飭沿途州縣幫同委員照民價代爲選購合用杆木一面派員驗收分屯先由西安電局撥匯銀三萬八千兩以付兩省購運杆價並由上海派員購運外洋材料機器一由清江運開封府一由襄陽信陽分運河南府一由天津運正定府已分飭候選縣丞李銘祥鄧嘉纘等由潼關開工至孟

縣候選知州沈兆棟等由孟縣開工至正定並派西安
官電局員直隸候補道孫寶琦王國楨督飭催辦就近
調度以速要工而免隔閡又查正定至保定本有電線
爲法兵奪佔計日可以收回尙須添料修理其由保定
至東京至天津天津至德州各處線路均爲拳匪折毀
淨盡臣一面籌款購料遴派委員學生分頭興造總期
於

詔令章奏朝發夕至不敢稍惜經費致誤事機惟數千
里工程浩大值此北路聯軍未退南路車價居奇一切
轉運工費較平時無不加倍昂貴在電局華商因去年

拆毀路線太多未免創深痛鉅經臣再三勸諭仍卽湊
集商本以赴公家之急尙屬情殷報効該商等特以墊
款太多懇將剛毅酌定常年報効銀兩案內本年應在
餘利內報効銀四萬兩暫緩報効一次俟將來商力稍
寬仍當飭令補繳臣覆查確係實在情形可否仰邀
俞允藉以稍紓商力臣不敢擅自定擬理合請
旨遵行所有籌集商本分別展造修復電綫以備傳遞
要報各緣由是否有當謹恭摺具陳伏乞

皇太后

皇上聖鑒訓示謹

奏 五月初五日奉

硃批著照所請該部知道欽此

蔡鈞捐振請獎片

光緒二十七年四月

再曾任蘇松太道蔡鈞接閱調任山西巡撫岑春煊電
信以山陝災重民不聊生倡捐庫平銀一萬兩交

臣彙

解臣查該道前在常鎮道署任內疏濬丹徒諫壁河重

建高資鎮石橋修築簕灣石路在蘇松太道任內捐助

仁濟醫院專建開北庇寒所地方均感其惠去歲北方

之難變產捐助濟急會洋銀六千元棉衣七千件交

臣

等解京分散都下被難官民藉資溫飽不下數十百家
在該道見義勇爲出於至性本無希名之念惟值此時
艱民困士夫慷慨樂輸殊不多覩在

長元不彙 卷三
三
朝廷自有獎勵之道以風示後來查前任蘇松太道龔照瑗等皆以助振

奏獎蒙

恩賞給頭品頂戴蔡鈞係二品頂戴曾任實缺道員應如何給獎之處祇候

恩施非臣下所敢擅擬謹附片陳明伏乞

聖鑒謹

奏 五月初五日奉

硃批蔡鈞著賞給頭品頂戴欽此

唐李氏等助振請准建坊片

光緒二十七年四月

再上年欽奉

諭旨籌辦陝西義振業經墊款解交嚴作霖赴陝查放
茲有廣東南海縣籍四品銜候選郎中唐德熙之生母
二品命婦唐李氏又浙江錢塘縣籍已故附生鍾康壽
之妻三品命婦鍾王氏因念關中被災甚廣施濟情切
願將積年衣飾變價充振先後各助銀一千兩共計庫
平銀二千兩由唐李氏遣子唐德熙鍾王氏遣子鍾祖
蔭分別呈解前來臣查唐李氏義方訓子鍾王氏勵節
撫孤今以振繁款急各能罄其所存慷慨捐助洵屬深

明大義核與建坊之例相附理合彙案奏請

恩准給予樂善好施字樣俾唐德熙鍾祖蔭等各在
原籍自行建坊以昭激勸除免收解陝以濟義振外謹附
片具陳伏乞

聖鑒謹

奏 五月初五日奉

硃批著照所請禮部知道欽此

呈進南洋公學新譯各書並擬推廣編輯摺

光緒二十七年六月

奏為進呈南洋公學新譯各書並擬推廣編輯以資治理恭摺仰祈

聖鑒事竊臣於光緒二十四年五月奏開南洋公學摺

內附片陳明於公學中設立譯書院繙譯東西政學各書以為成才之助奉

硃批著照所議辦理欽此等因在案開辦以來臣與奏

派總理公學知府何嗣焜等分類審擇督諸譯員昕夕

編摩先後成書若干種臣初以練兵為急務故兵學居

多理財商務學校次之昨接准兩江督臣劉坤一咨稱

接政務處咨取製造局南洋公學所譯各書以備甄採
仰見

明詔所頒與天下更始之至意可於譯書一事發其端
倪臣嘗思西學西政孰同孰異皆當與中國本有之文
學政事融會貫通方能得其要領而不爲所囿其書籍
浩如煙海若必待先通西文而後能課西學則人才輩
出至速須在十數年之後且列國方言仍非盡人通曉
若必使通曉方言而後可當大任恐將置外國文字於
本國文字之上專固不通非知政理者矣埃及學校課
西學以歐文以故衰削日本更化之始先於學校以東

文徧譯西書上而將帥公卿下而販夫走卒皆於西學有所取裁遂以一島國雄視環球此其明效大驗也中國士大夫近年得以稍知歐西情事者未始非參考西書之益所惜政學譯本太少耳當臣開譯之初本期以西學中文資成才成名者之講求爲

國家早收得人之效及今日世變益深需材益亟拯溺救焚之事會豈能待諸佩觿垂帶之學童目前課吏舉能固必仍責諸更事之員取之成材之彥卽將來用人之道似亦未可偏重西文西語惟折衝樽俎交涉宜有方言此外政學仍宜歸重中文是以譯書需多亟宜廣

採分輯同治初年曾國藩等以經史書板多燬於兵燹
奏明各省設官書局分刊十三經二十四史徧及各種
子集已足供誦讀可否請

飭下各省官書局改爲譯印書局並由政務處電令出
使各國大臣將東西文政學新理有用之書廣爲購備
斟酌極要次要隨時擬定目錄分飭各省尅期繙譯刊
印一則籌款眾擎易舉二則成書不患重複三則紙板
可免參差臣職司商務擬卽選取各國賦稅度支以及
商務礦山銀行各章程督飭專員趕緊繙輯總期日積
月累與學校相爲表裏務使東西文得中文闡發而無

偏弊則中學得東西學輔翼而益昌明不待十年必有
偉材以佐

盛治茲先將公學所譯各書已經排印十有三種敬謹
裝治成套齎送軍機處恭呈

御覽尙有譯成兵政八種理財一種商務二種學校三
種稅法一種俟排印齊全再行齎送至坊肆中近來譯
印各書甚夥擬擇其正當者編成目錄另咨政務處俾
備採取所有呈進已譯各書並擬推廣編輯以資治理
緣由理合恭摺具陳伏乞

皇太后

皇上聖鑒謹

奏 七月十二日奉

硃批知道了著卽推廣緝輯書留覽欽此

請調沈曾植費念慈委用片 光緒二十七年六月

再譯書院原設在南洋公學之內經 臣奏派知府何嗣焜倡率好學知名之士試辦有年祇因經費奇絀成書不多今春何嗣焜歿於公學事恐中輟值茲時會正以擴充譯事爲急務必須遴員總理以專責成查有三品銜刑部候補郎中沈曾植品學粹然縝密而栗平日講求經濟各國公法條約亦頗深閱歷翰林院編修費念慈潛心經史通達時事於古今中外治亂得失能窮其流該二員皆以禮在籍服闋後澹於利祿慨念時艱互相砥礪爲有用之實學 臣每與縱談自強之基不外練

兵理財而練兵理財之人才必出於學爲學之根本尤在譯書然譯書宜先提其綱領齊其目錄求其譯才至籌款雖難尙其次焉者也夫使各省疆臣通力合作事或易舉臣以閒曹襄辦商務頻年自籌微款勉爲其難何殊精衛之思填海愚公之欲移山也該二員徒以志切匡時不辭艱瘁尙願相隨以承其役其氣詣之堅卓已可概見可否仰懇

飭下該衙門准將沈曾植費念慈二員交臣委用實於譯書之事不無裨助謹附片具陳伏乞

聖鑒訓示施行謹

奏 七月十二日奉

硃批著照所請該衙門知道欽此

請專設東文學堂片

光緒二十七年六月

再譯書宜兼通中外之學而尤以專門爲貴臣所譯兵
書係延聘日本通中文者一人陸軍少尉一人會同繙
譯始無訛錯西人兼通中文者極少中國通西學者亦
不多製造局書大都英人口譯而華人筆述之頗爲艱
苦公學現印原富一書爲候選道嚴復所譯該道中西
學問俱優故稱善本臣又託使臣羅豐祿覓得英國商
律全書卷帙浩繁擬卽派公學提調候選知府伍光建
繙譯約須兩年告成譯才如嚴復伍光建者實罕其匹
現欲推廣搜輯似以轉譯日本已輯西學之書較爲稍

易近有日本議紳子爵長岡護美在滬設立同文書館以彼國普通學生加習中文中學其取精用宏之意至深且遠長岡護美來遊南洋公學臣與考訂一切屬其延訂專門法學一人又另聘兼通中學之教習來滬專設東文學堂選取秀士數十名專課東文東學據稱質地聰穎者一二年後文字可通舉以譯書可期事半功倍惟西國專門之學必有專字門類極繁東人譯西文先有定名中國譯東西文尙無定名則譯字互異閱者易滋迷誤亟宜將各國輿地官職度量權衡及一名一物撰擬名目類表以求畫一嗣後官譯私著悉依定稱

惟體例尤須精審擬寬其歲月責成譯書院會同公學
及東文學堂分別參訂再行呈送政務處核定頒發所
需款項暫於學堂商捐內籌措以期成斯要舉而免徒
託空言謹附片具陳伏乞

聖鑒謹

奏 七月十二日奉

硃批知道了欽此

陳廬氏助振請准建坊片

光緒二十七年六月

再上年欽奉

諭旨籌辦義振業經墊款解赴秦晉分別查放茲有廣東新會縣籍五品銜候選縣丞陳煥彬之繼母五品命婦陳廬氏因念秦晉災重地廣情殷施濟遺其子將故父候選同知陳致祥故母陳歐陽氏遺下產業變價充振計助庫平銀一千兩呈解前來臣查陳廬氏青年守節教子有方今因西北偏災能以撫孤養家之資捐助急振洵屬深明大義核與建坊之例相符理合援案奏請

恩准給予樂善好施字樣俾陳煥彬在原籍自行建坊
以昭激勸除兌收解濟義振外謹附片具陳伏乞
聖鑒謹

奏 七月十二日奉

硃批著照所請禮部知道欽此

上海華廠紡織虧累招商接辦摺 光緒二十八年八月
洋通商大臣劉會後銜 商務大臣李 南

奏爲上海華廠機器紡織歷年虧累甚重亟圖招商接
辦以求挽回恭摺具陳仰祈

聖鑒事竊光緒十九年上海織布局廠機被焚北洋大
臣李鴻章以洋貨進口紗布實爲大宗應在上海號召
華商另設機器紡織廠以土產敵洋貨力保中國商民
自有之利權其時 臣 在津海關道任內當奉

奏派赴滬將前局結束分籌資本規復一面設法擴充
嗣經招徠新股就織布局舊址設立華盛廠另在上海

激勸華商招股分設華新大純裕源裕晉等廠先收股
分一半次第開辦布置年餘廠屋造竣機器到齊未幾
而日本衅生馬關約定商股觀望未交之款招之不來
機錠已開勢無中止商董竭蹶籌款力已難支而洋商
得在滬改製土貨之條急起直追來與我角怡和瑞記
公茂鴻源各洋行運機造廠先後開辦花價因爭買而
益漲工價因爭僱而益昂在上海華洋商廠皆聚於楊
樹浦一隅互相傾軋無不虧本而華商魄力太微與各
洋廠馳逐於咫尺之地不待智者而策其必敗矣裕晉
廠見機獨早稟請將全廠售歸德商裕源廠亦稟請另

招洋商入股大純華新均岌岌自危不可終日華盛機器倍多虧折愈甚茲據華盛廠商董稟稱該廠原奏係承接布局冀以土產抵拒洋貨故購辦紡紗機器至六萬五千錠之多織布軋花機器俱全所用資本二百八萬餘兩甫經收集商股八十萬兩卽遭甲午之變洋廠紛來華股裹足而機廠各價不能不付乃由商董籌借息債支持危局七年之久截至光緒二十六年十二月止將原股八十萬虧完之外並將應給各債項利息酌量豁除尙虧墊銀十六萬餘兩所有息借各款紛紛催偪補救無方經各股商會議不願再添資本祇得將該

廠地基房屋機器等項悉照原價全盤售與集成公司計價銀二百十萬兩該廠機器房屋已舊而集成華商允照原價承受實因前廠息借各款已無現銀可收不得已添湊股本受此呆產喫虧亦鉅此外虧墊十六萬餘兩應按照公司章程責成股商陸續設法攤還業已另立售契改名集成悉歸新股接辦所有華盛舊股既不添本以後新股盈虧皆與舊股無涉其所執華盛及織布老局股票一概作廢以符公司章程稟請批准會奏立案前來臣查中外商務無論夥開獨開皆准歸併頂替况華盛廠商虧折鉅款實已無力添本其買花僱

工紡織之資亦無可再挪若聽其停工止辦不特與抵
拒洋貨本意不符且機器一經停輟必致銹損難修無
可收拾自應准其另招新商頂替改換廠名再接再厲
核與商務章程毫無違礙該廠前係北洋大臣李鴻章
會同南洋大臣劉坤一

奏明在案所有歷年紡織虧累亟圖招商接辦情形理
合會同商務大臣直隸總督臣李鴻章南洋通商大臣
兩江總督臣劉坤一合詞恭摺具陳伏乞

皇太后

皇上聖鑒訓示謹

奏 本月二十一日奉

硃批該部知道欽此

湖北鐵廠免稅展限摺 光緒二十七年九月 鄂督張

奏為湖北鐵廠製鐵免稅期滿懇請展限五年恭摺仰

祈

聖鑒事竊於光緒二十二年九月間以鐵廠官本重大

煉鐵與製造不同經湖廣督 臣張之洞

奏請優免稅釐十年奉

硃批該衙門議奏欽此旋據戶部咨稱十一月十一日

會議覆奏准其免稅五年奉

旨依議欽此欽遵在案溯自光緒二十二年十二月初

十日接准部咨之日起扣至二十七年十一月十一日

五年期滿據總辦鐵廠委員等呈報前來臣等查鐵廠利源所在以盧漢鐵路鋼軌爲大宗自舊歲京津匪亂以來路燬工停數十萬銷路驟斷挹注無資危機迭出徒以廠有

國家鉅本且關係於製造鎗礮軍火者甚爲緊要勢不能若民間廠局散匠停鑪卽不得不竭力支撐借貸挪移保目前以作將來之備舊虧未已新欠旋增臣宣懷督飭經管各員董鎮定從容措拄於絕續之交實已備殫心力目下北方大定榦路興工方冀鋼軌銷數暫增出入可資津補而又屆免稅限滿之期如一切料件卽

令照章完納稅釐力所不任將憂虧倒蓋稅釐加則成本必重成本重則銷路愈難際此中外市面鐵價減跌之時方謀輕成本暢銷路之不遑若加釐稅以困之貨滯銷停稅於何有此鐵廠目下情形不得不籲懇

朝廷將免稅期限再展五年以恤廠艱而維鐵政者也
近歲振興商務迭奉

綸言礦產工政爲富國之基亦已人人共喻夫鼓舞未興之業事遠而效遲固不若保護已成之局事易而效速大冶鐵廠材富質良爲長江一帶礦產之精華東西各國其所注目苟

國家財力有餘尙當增籌鉅款盡力擴充則現在該廠支絀之時自應曲加保護保護之道無他輕其成本暢其銷路是已且新約禁止軍火入口將來自行製造需用鋼鐵至多舍該廠無所取之尤宜加意維持以爲取材之本可否籲懇

恩施飭下該部再予免稅五年仍符二十二年原奏十年之數出自

逾格鴻慈臣等不勝待命之至該廠以商本濟官本之窮名曰商辦寶資官用與一切商廠不同量加優異無慮援引所有鐵廠免稅懇請展限緣由理合會同湖廣

督^臣張之洞恭摺具陳伏乞

皇太后

皇上聖鑒謹

奏 本月三十日奉

硃批著照所請該部知道欽此

請調何其坦差遣片

光緒二十七年九月

再恰克圖電線前經總理各國事務衙門以俄國立約限期設造以杜強鄰侵佔線路臣卽勸諭華商籌款購料奏派已革在任候選道江西餘干縣知縣何其坦前往建設於光緒二十三年二月奉

旨該部知道欽此二十五年十二月奏報工竣在案去年拳匪之亂將京城至張家口又自張家口至大馬羣一帶電線電杆數百里全行拆燬大北公司以有礙中俄陸路通電之路意欲請歸該國接造臣以此線前糜商本六十餘萬之多若以近京至口外讓歸外人代設

恐礙大局不得已仍勸令華商籌款購料自行補造但時值民窮財盡於直隸全省電線補造之際復欲力籌鉅款實屬難上加難總理工程尤非廉正之員不足取信於人查何其坦前辦怡工勤勞卓著此次自應仍令前往修復以收駕輕就熟之效惟該員前經奏派尙係被議人員茲復委辦緊要工程理合先行陳明可否仰懇

天恩俯准將該員何其坦交臣差遣委用之處出自逾格鴻慈謹附片陳請伏乞

聖鑒訓示謹

奏 本月三十日奉
硃批著照所請該部知道欽此

愚齋存彙卷第五

愚齋存彙卷第五